

¶ *Quibus signis interna vulnera dignoscere possint.*

CAP. XVII.

Vlnus dissolutio continui est, quæ fit in molli membro. In hoc genere sunt venæ menyngum cerebri quas vulneratas esse, significat sanguis è naribus, auribus & ore eius fluens, cui caput percussum est, etiam si nihil aut fractum, aut contusum foris in eo appareat. Item, crassam menyngem vulneratam esse indicat fungus, hoc est globosa densaque substantia, quæ quidem fracto cranio conspicitur: ibi enim fit hic fungus ex tenui menynge substantia cerebri plena, quæ per vulnus alterius menyngis, quæ crassa est, pertransit. Easdem cerebri menynges lædi magis magisque intelligimus, si protinus à casu, aut ictu æger obmutescit, aut paralyti, aut conuulsione, aut graui sopore corripitur: quæ etiam symptomata eis eueniunt, quorum ipsi capitis muscnli, qui crotaphite dicuntur, vulnerati sunt. Internas quoque capitis partes vulneratas oculi testantur, qui ob ictum, aut lapsum ab alto rubri inflammatique videntur. Eadem vulnera confirmat biliosus vomitus, qui vel primo, vel secundo, aut deinceps alio die ab inflicto vulnere excitatur. Pulmonem item vulneratum esse certò cognosces, si ex vulnere

in